

Na osnovu člana 23. stav (1) Ustava Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/98, 10/00, 5/03 i 8/04), Skupština Bosansko-podrinjskog kantona Goražde, na Godišnjoj sjednici, održanoj 28. februara 2022. godine, utvrđuje:

## **CILJEVE I POLITIKU BOSANSKO-PODRINJSKOG KANTONA GORAŽDE ZA 2022. GODINU**

### **UVOD**

Bosansko-podrinjski kanton Goražde ovim dokumentom utvrđuje ciljeve i politiku za 2022. godinu, a isti su usmjereni ka izgradnji Bosansko-podrinjskog kantona Goražde (u daljem tekstu: Kanton) kao regiona koji će biti mjesto kvalitetnog življenja sa pogodnim privrednim okruženjem i snažnom privrednom infrastrukturom koja će omogućiti produktivno i kontinuirano zapošljavanje, kvalitetnom zdravstvenom i socijalnom zaštitom, efikasnom administracijom i održivim korištenjem prirodnih resursa.

Naravno, Bosansko-podrinjski kanton Goražde kao ustavna kategorija unutar Bosne i Hercegovine i Federacije BiH svoje strateške ciljeve određuje u skladu sa opštim ciljevima definisanim na nivou države i koji su najvećim dijelom povezani sa euroatlanskim integracijama, istovremeno cijeneći specifičnosti samog Kantona, te iste nastoji ostvariti kroz utvrđene prioritetne ciljeve i politike.

Prilikom izrade Ciljeva i politike Bosansko-podrinjskog kantona Goražde za 2022. godinu imale su se u vidu sve specifičnosti samog Kantona, ali i činjenica da je nakon okončanja pandemije koronavirusa COVID-19 došlo do ponovnog jačanja vanjske trgovine i inostranih priliva novca Bosne i Hercegovine te do intenziviranja bosanskohercegovačke ekonomske aktivnosti u odnosu na predhodnu godinu, a samim tim i do povećanje proizvodnje i zaposlenosti tokom koje bi trebalo rezultirati rastom primanja kako preduzeća tako i domaćinstava.

Navedeno je rezultiralo i rastom javnih prihoda u 2021. godini zbog ponovnog intenziviranja ekonomske aktivnosti u odnosu na predhodnu godinu, kao i zbog osjetne inflacije koja je nastupila nakon pandemije koronavirusa COVID-19.

Zbog naprijed navedenog, a u cilju provođenja mjera ekonomske politike koje će omogućiti stabilan i održiv ekonomski razvoj, neophodno je provoditi aktivnosti i mjere koje će za posljedicu imati poboljšanja i rast privrednih aktivnosti što se direktno pozitivno odražava na povećanje prihoda. Pored toga potrebno je održavanje stabilnosti budžeta, zbog čega je posebno značajno poduzimati odgovarajuće mjere u cilju adekvatnog restrukturiranja rashoda u cilju postizanja maksimalnih efekata u cilju ekonomskog razvoja i povećanja javne potrošnje a sve radi održavanja dugoročne finansijske stabilnosti i poboljšanja životnog standarda.

U isto vrijeme će se poduzimati aktivnosti ka pozicioniranju Kantona u sistemu raspodjele javnih prihoda, te aktivnosti koje bi za posljedicu, odnosno ishod trebale imati veću kontrolu nad dosljednom primjenom postojećih propisa kojima se uređuje pitanje ostvarivanja prihoda te izvršavanja rashoda iz budžeta.

Naprijed navedenom će značajno doprinjeti aktivnosti na provođenju antikoruptivnih mjera koje su dale značajne rezultate na prevenciji i sprječavanju korupcije, uspostavljanju mehanizama kontrole u cilju dosljedne primjene postojećih propisa i otklanjanja nezakonitosti i nepravilnosti u radu. U narednom periodu će se antikoruptivne aktivnosti značajno intenzivirati a radi postizanja veće efikasnosti na provođenju antikoruptivnih aktivnosti će se formirati Uprava za sprječavanje i borbu protiv korupcije Bosansko-podrinjskog kantona Goražde.

Značajne aktivnosti će se poduzimati na podizanju nivou transparentnosti rada kroz unapređenje web stranice Vlade Kantona, objavljivanje svih informacija o zaposlenim i imenovanim licima, o javnim nabavkama i dodjeljenim transferima, te uvođenja drugih novih sadržaja.

Sve, navedene aktivnosti će omogućiti postizanje finansijske stabilnosti, te značajno doprinjeti razvoju kvalitetne, efikasne i transparentne javne uprave u službi građana Kantona što je uz jačanje infrastrukturnih kapaciteta pretpostavka za daljnji ekonomski razvoj i unaprijeđenje uslova života na području kantona.

Ciljevi i politike iz oblasti obrazovanja su zasigurno najvažnije za svako društvo jer je obrazovna i kadrovska politika najvažnija za razvoj svakog društva i države. Zbog navedenog značajno će se intenzivirati unapređenje sistema obrazovanja kroz razvoj sistema nastave i praćenja i unapređenje kvaliteta nastave, kao i pitanjima daljnjeg razvoja predškolskih i školskih ustanova. Posebna pažnja će biti usmjerena u infrastrukturno poboljšanje uslova u školama. Uspostavit će se poboljšani normativni okvir u oblasti osnovnog obrazovanja i oblasti obrazovanja odraslih (cjeloživotnog učenja), te će se dodatno raditi na prilagođavanju obrazovnog sistema potrebama tržišta rada, kao i prilagođavanju obrazovnog sistema određenim vanrednim situacijama koje mogu biti prouzrokovane pandemijama ili nekim drugim vanrednim okolnostima. Taj okvir će podrazumjevati unapređenje kvaliteta nastave, edukaciju nastavnog osoblja, adekvatno obrazovanje potrebnih kadrova za rad u predškolskim i školskim ustanovama, te uvođenje sistema stipendija u skladu sa potrebama tržišta rada

Oblasti zdravstva i jačanju sistema zdravstvene zaštite će se u 2022. godini posvetiti posebna pažnja, posebno jer smo još uvijek suočeni sa pandemijom koronavirusa COVID-19. Tako će u oblasti zdravstva narednu godinu obilježiti provođenje aktivnosti na poboljšanje stanja u zdravstvu. Prioritetno se izdvajaju aktivnosti specijalizacije ljekarskog kadra, uspostave informacionog sistema u zdravstvu i jačanje i uspostavu svih službi u okviru sistema zdravstvene zaštite što uključuje i okončanje aktivnosti na uspostavi dijaliznog centra.

Pitanja razvoja infrastrukture u oblasti saobraćaja, ruralnog razvoja, turizma, obrazovanja, zdravstva, zaštite okoliša, privrede je bitan segment u radu svake administracije, što nije izuzetak ni u ovom slučaju. U 2022. godini aktivnosti će biti značajno usmjerene na unapređenje infrastrukture na području Bosansko-podrinjskog kantona Goražde, kroz modernizaciju i rekonstrukciju postojeće infrestrukture kao i kroz poduzimanje potrebnih aktivnosti iz nadležnosti Bosansko-podrinjskog kantona Goražde u cilju blagovremene realizacije infrastrukturnih projekata koji su od strateškog značaja za Bosansko-podrinjski kanton Goražde kao što je izgradnja brze ceste za Sarajevo. Naime, izgradnja brze ceste predstavljat će snažan generator daljnjeg razvoja Kantona, obzirom da se izgradnjom iste stvaraju povoljniji uslovi za život stanovništva, te za poslovanje privrednih subjekata na području Bosansko-podrinjskog kantona Goražde

U 2022. godini će mjere i aktivnosti biti usmjereni posebno na privredu, privredu kojoj se Bosansko-podrinjski kanton Goražde stavlja na raspolaganje kao partner koji će zakonodavnim i operativnim mjerama poboljšavati privredni ambijent, i koja će nastojati održati postojeću harmoniju i sinergiju djelovanja privrednika Bosansko-podrinjskog kantona, kao najvažnijeg generator razvoja. Istovremeno će se poduzimati potrebne mjere kako bi se u 2022. godini povećao nivo životnog standarda i javne potrošnje u Bosansko-podrinjskom kantonu Goražde, kako bi se održao ili povećao broj zaposlenih.

U cilju unapređenja socijalnog dijaloga dodatno će se ojačati i unaprjediti uloga ekonomsko-socijalnog vijeća i osnivanje poslovnog savjeta kao stručno-konsultativnog tijela za razvoj ekonomskih i socijalnih politika u Kantonu.

U kontekstu daljnje primjene novog radnog zakonodavstva i kolektivnog ugovaranja pristupit će se usaglašavanju i povećanju ličnih dohodaka.

U 2022. godini će se održavati i razvijati saradnja sa drugim nivoima vlasti i institucijama u BiH i entitetima, uključujući i lokalne zajednice i NVO kroz koje će nastaviti dobru praksu implementiranja projekata i privlačenja sredstava.

Segment sigurnosti u 2022. godini će dominantno obilježiti programi sprječavanja i otkrivanja koruptivnih krivičnih djela, krivičnih djela iz oblasti proizvodnje i stavljanja u promet opojnih sredstava, povećanja sigurnosti i suzbijanja različitih oblika društveno opasnog ponašanja.

Pitanje boračke zaštite je svakako bitno u smislu implementacije ostvarenih prava, poboljšanja stanja osiguranja smještaja boraca i ukupnog poboljšanja statusa, kao i analiziranja postignutih efekata postojećih intervencija.

Provođenjem ovih Ciljeva i politika u 2022. godini i stvaranjem atmosfere povjerenja, međusobnog uvažavanja i poštovanja, kroz demokratski dijalog iskoristit ćemo sve kvalitete koje takav sistem može ponuditi i od Bosansko-podrinjskog kantona Goražde napraviti moderan, evropski orjentisan kanton.

## **STRATEŠKI CILJEVI U 2021. GODINI**

Vizija razvoja BPK Goražde iskazuje stratešku težnju da BPK Goražde postane savremena evropska regija, orijentisana na održive aspekte razvoja gdje se razvoj posmatra kao više dimenzionalan proces ekonomske, društvene, okolišne, prostorne i institucionalne transformacije sa ciljem poboljšanja kvaliteta i standarda života građana i građanki. Vizija uključuje inkluziju svih sektora društva u razvojne procese, uključujući javni, privatni i civilni sektor. Na temelju strateških fokusa i vizije BPK Goražde definisana su tri strateška cilja, koji osiguravaju sinergijske efekte između razvoja ekonomije, okoliša i društva, uz puno uvažavanje interesa lokalne uprave.

Strateški ciljevi Bosansko-podrinjskog kantona Goražde već drže vrijeme su strukturirani na slijedeći način:

### **Strateški cilj 1: Uspostaviti održivi ekonomski rast**

Za ostvarenje vizije razvoja BPK Goražde ključno je obezbijediti uslove za razvoj privrede koja je osnovni generator razvoja i koja stvara preduslove za društveni napredak, razvoj infrastrukture i veći stepen zaštite okoliša. Zbog toga je kao prvi strateški cilj razvoja BPK Goražde definisano uspostavljanje održivog ekonomskog rasta što podrazumijeva uspostavljanje pogodnog privrednog okruženja i dinamične privrede, koje će se zasnivati na korištenju svih raspoloživih potencijala, prije svega prirodnih resursa i poslovne tradicije. Ovim ciljem će se postići pozitivni efekti koji se odnose na povećanje izvoza, razvoj malih i srednjih preduzeća, ruralni razvoj, obogaćivanje turističke ponude, te unaprijeđenje putne infrastrukture, a koji su obuhvaćeni prioritarnim ciljevima u okviru prvog strateškog cilja razvoja BPK Goražde.

U cilju ostvarenja strateškog cilja uspostavljanja pogodnog poslovnog okruženja i dinamične privrede BPK Goražde, definisani su prioritarni ciljevi. Krajni ishodi definisanih prioritarnih ciljeva treba da doprinesu: razvoju industrijske proizvodnje kroz povećanje fizičkog obima industrijske proizvodnje, povećanje izvoza, povećanje proizvodnje domaćih ulaznih

komponenti za industriju i smanjenje uvoza, kao i povećanje ukupnih ostvarenih investicija u sektoru industrije; zatim razvoju ruralnih sredina kroz povećanje poljoprivredne osnove (površine obrađenog zemljišta, stabala voća, grla stoke) i proizvodnje šumskih sortimenata; razvoju turizma kroz obogaćivanje turističke ponude i privlačenje turista za povećanje dolazaka i noćenja turista na području BPK Goražde; razvoju poduzetničke infrastrukture i poslovnog okruženja za povećanje broja poslovnih subjekata i zapošljavanja; te razvoju putne infrastrukture i povezanosti BPK Goražde sa susjednim regijama kroz izgradnju cesta, te rekonstrukciju lokalnih puteva i izgradnju mostova.

### **Strateški cilj 2:** Učiniti BPK Goražde mjestom kvalitetnog življenja

Unapređenje kvaliteta življenja kroz stvaranje održivog i inkluzivnog društvenog okruženja je strateški cilj razvoja BPK Goražde koji će se postići kroz unapređenje kvaliteta usluga javne uprave i jačanje segmenta pravde i sigurnosti, jačanje i podršku obrazovanju, sportu i kulturi i unapređenje tržišta radne snage, unapređenje kvaliteta življenja stanovnika BPK Goražde oslanjajući se na poboljšane zdravstvene usluge i reformskim aktivnostima u oblasti socijalne zaštite. Neophodno je voditi računa o kontinuiranom razvijanju ljudskih potencijala, te razvoju sadržaja za sve društvene grupe na području BPK Goražde, jer socijalna uključenost se smatra ključnim uslovom za održiv dugoročni razvoj. Data oblast obuhvata 4 prioriteta kojima se ostvaruje drugi strateški cilj razvoja BPK Goražde.

Sama svrha lokalnog ekonomskog razvoja je proces poboljšanja ekonomskog kapaciteta lokalne zajednice u nastojanju da se poboljša njena ekonomska budućnost i kvaliteta života njenih građana. U tom procesu, sve interesne skupine su vrlo bitne za socio-ekonomski rast i razvoj. Osiguranje visokog stepena sigurnosti građana, kontinuirano razvijanje ljudskih potencijala BPK Goražde kroz obrazovanje, sport i kulturu, unapređenje tržišta radne snage, osiguranje pravednog sistema socijalne i zdravstvene zaštite baziranog na potrebama kantona su ključne težnje i prioritetni ciljevi u sklopu ovog strateškog cilja.

### **Strateški cilj 3:** Osigurati održivo upravljanje okolišem i jačati infrastrukturne kapacitete Kantona

Imajući u vidu da BPK Goražde teži ka industrijskom razvoju, uključujući i unapređenje poslovnih zona, neophodno je osigurati efikasnu uspostavu i instrumente implementacije mjera zaštite okoliša i očuvanja prirode kako bi se razvijale i ostale privredne grane te obezbijedio kvalitetan život za građanstvo Kantona. Kako bi se osiguralo održivo upravljanje okolišem i prirodnim resursima, omogućila kvalitetna komunalna usluga stanovnicima BPK Goražde, te stvorile osnovne pretpostavke za dalji razvoj privrede, zacrtan je treći strateški cilj. Ovim ciljem će se postići pozitivni efekti i stvoriti svi preduslovi i normativni okviri za doprinos u zaštiti i očuvanju okoliša kroz unapređenje infrastrukture u domenu informacionih sistema za integralno upravljanje okolišem, unapređenje komunalne infrastrukture, te zaštitu i sanaciju okolišnih komponenti (voda, zemlja, zrak), te zaštitu i unapređenje prirodnih resursa i obnovljivih izvora energije.

Prioritetni ciljevi su: Osigurati efikasnu uspostavu i instrumente implementacije mjera zaštite okoliša i očuvanja prirode; Jačati komunalne infrastrukturne kapacitete; Povećanje energetske efikasnosti postojećih potrošača i unapređenje korištenja obnovljivih izvora energije.

Doprinos ostvarenju pomenutih strateških ciljeva ostavlja široke mogućnosti razvoja aktivnosti. Realizacija ukupno navedenog strateškog okvira kroz mjere i aktivnosti Vlade u 2022. godini uveliko će zavisiti od ukupnih aktivnosti vlasti u Federaciji BiH, saradnje i finasijskog okvira koji će biti ostvaren u toku budžetske godine.

Imajući u vidu rezultate, obaveze, probleme, iskustva kao i ciljeve iz strategije i ciljeva Vlade Kantona i resornih ministarstava, Bosansko-podrinjski kanton Goražde je u toku 2022. godine planirao ostvarivanje svojih strateških ciljeva zasebno po resorima. S tim u vezi, u nastavku dokumenta utvrđeni su i određeni ciljevi i politike Bosansko-podrinjskog kantona Goražde za 2022. godinu po resorima.

## **FINANSIJE**

U narednom periodu aktivnosti u sektoru finansija biti će usmjerene u koordinaciju i usklađivanje svih bitnih planskih dokumenata. Prema Zakonu o razvojnom planiranju i upravljanju razvojem u Federaciji BiH, obaveza svih organa uprave i upravnih organizacija je donošenje trogodišnjih planova rada, koji moraju biti usklađeni s Strategijom razvoja Bosansko-podrinjskog Kantona Goražde, budžetskim programima i projektima. Na taj način će se sredstvima planiranim u DOB-u, Programu javnih investicija i Budžetu, ostvariti bolja povezanost između strateških planova i strateških dokumenata, kako bi se omogućila njihova implementacija.

Ključna usmjerenja trogodišnjeg/godišnjeg plana rada jesu stabilizacija budžeta, podizanje finansijske odgovornosti na viši nivo te iznalaženje sistemskih rješenja na povećanju javnih prihoda BPK-a. Kontrola buduće potrošnje ogleda se između ostalog i kroz dosljednu primjenu Pravilnika o proceduri za izradu izjave o fiskalnoj procjeni zakona, drugih propisa i akata planiranja na Budžet. Također će se nastaviti provoditi inspekcijski nadzor zakonitosti, blagovremenosti i namjenskog korištenja budžetskih sredstava kojim će se nalagati mjere za otklanjanje utvrđenih nezakonitosti i nepravilnosti s ciljem njihovog smanjenja.

## **PRIVREDA**

Jedan od značajnih faktora daljeg razvoja privrede je stabilizacija poslovanja privrednih subjekata nakon negativnih ekonomskih posljedica nastalih usljed pandemije COVID -19. Fokus jednogodišnjeg plana u sektoru privrede će biti na predlaganju i provođenju politike u oblasti industrije, poduzimanju mjera za unaprijeđenje proizvodnje, upravljanje prirodnim bogatstvima, razvoju poljoprivrede, upravljanju poljoprivrednim zemljištem, podršci uzgoju, zaštiti i unaprijeđenju šuma, šumskoj komunikaciji i eksploataciji šuma, očuvanju industrijske vode, vodoprivrednih aktivnosti, korištenju voda u energetske i rekreacijske svrhe, upotrebi i zaštiti voda, ulaganju u privredna preduzeća, podršci prometu roba i usluga, učešću u kreiranju politike uvoza i izvoza, kontroli cijena proizvoda i usluga, zaključivanju ekonomskih sporazuma, kreiranju i implementaciji politike kantonalnog turizma, razvoju turističkih resursa, razvoju rekreativnih, rehabilitacijskih i drugih centara, promociji turizma, ugostiteljstva, poduzetništva, provođenju politike razvoja komunikacija i transportne infrastrukture, razvoju javnog prometa, izgradnji, obnovi i održavanju saobraćajnica od značaja za Kanton, modernizaciji cestovnog prometa i osiguranju komunikacijskih veza na području Bosansko-podrinjskog kantona Goražde. Sve navedene aktivnosti doprinjeće i realizaciji strateških ciljeva razvoja BPK Goražde.

## **SOCIJALNA POLITIKA, ZDRAVSTVO, RASELJENA LICA I IZBJEGLICE**

Fokus aktivnosti u sektoru socijalne politike, zdravstva, raseljenih lica i izbjeglica u narednom periodu ostvarit će se kroz programe iz oblasti u nadležnosti Ministarstva i to: unaprjeđenje socijalne inkluzije kroz ciljano i bolje usmjeravanje javnih rashoda za socijalnu zaštitu, provođenje pronatalitetnih politika, unaprjeđenje kapaciteta i usluga zdravstvenih ustanova sa posebnim osvrtom na završetak svih aktivnosti na uspostavi Hemodijaliznog centra pri JZU Kantonalna bolnica Goražde, poduzimanje svih aktivnosti iz nadležnosti ministarstva sa akcentom na poboljšanje kvaliteta i pružanje što bolje zdravstvene usluge u svim zdravstvenim ustanovama na području BPK Goražde s posebnim osvrtom na prevenciju i borbu protiv pandemije COVID-19, poboljšanje kvaliteta i stručnog kadra u zdravstvenim ustanovama kroz potrebna upošljavanja i odobrenje potrebnih specijalizacija, te poboljšanje materijalnog statusa zdravstvenih radnika, kao i provođenje aktivnosti i obezbjeđivanje svih potrebnih uslova za kontinuirano provođenje pronatalitetnih politika.

### **BORAČKA PITANJA**

Fokus podrške pripadnicima boračkih populacija biće u razvoju i jačanju njihovog statusa te zaštite tekovina borbe za očuvanje Bosne i Hercegovine. Realizacija prioriteta Ministarstva ostvarit će se kroz: Program unaprijeđenja statusa pripadnika boračke populacije, Program zaštite tekovina borbe za očuvanje BiH i jačanje kapaciteta neprofitnih organizacija u oblasti boračko-invalidje zaštite, Program praćenja stanja u oblasti boračko-invalidske zaštite i koordinacije rada sa drugim organima i udruženjima boračkih populacija te Program osiguranja administrativnih i tehničkih uslova za efikasan rad Ministarstva.

Od aktivnosti na realizaciji programa posebno se ističu podrška pripadnicima boračke populacije u oblasti zdravstvene zaštite i liječenja, podrška u školovanju i zapošljavanju, podrška u stambenom zbrinjavanju te podrška u oblasti socijalno-statusne zaštite.

U okviru aktivnosti u sektoru za boračka pitanja su i značajni investicioni projekti izgradnje centralnog spomen-obilježja braniocima Goražda i spomen-obilježja komandantu Zaimu Imamoviću te ostale aktivnosti kao što su:

- Praćenje stanja u oblasti boračko-invalidske zaštite i poduzimanje odgovarajućih mjera;
- Saradnja sa lokalnim zajednicama na realizaciji projekata iz oblasti boračko-invalidske zaštite;
- Efikasan rad udruženja boračkih populacija;
- Neometano održavanje sportskih manifestacija invalida.
- Pružanje pomoći porodicama pripadnika boračkih populacija osumnjičenih za ratne zločine;
- Osiguranje neometanog funkcionisanja i Informacionog sistema boračko-invalidske zaštite uspostavljenim na nivou Federacije Bosne i Hercegovine (ISVDV);
- Ažuriranje baza podataka korisnika dopunskih prava;

Navedeno se očekuje da rezultira povećanim brojem odobrenih aplikacija za finansiranje iz vanjskih izvora. Stvaranjem bolje saradnje, koordinacijom i usklađivanjem rada općinskih

organa uprave te nevladinog sektora, omogućiti će se multiplikacija razvojnih efekata i efikasna implementacija dopunskih prava branilaca i članova njihovih porodica u BPK Goražde.

## **OBRAZOVANJE, MLADI, NAUKA, KULTURA I SPORT**

U oblasti razvoja predškolskog odgoja i obrazovanja, ključno usmjerenje biti će stvaranje uslova za nastavak realizacije obaveznog programa za djecu pred polazak u osnovnu školu, stvaranje što boljih uslova u predškolskim ustanovama kako bi se boravak djece učinio što ugodnijim itd. U oblasti razvoja osnovnog odgoja i obrazovanja fokus će biti na koordinaciji opremanja školskih prostora, te nabavke opreme i učila sve u cilju stvaranja što boljih uslova za odvijanje nastavnog procesa, provođenje kurikularne reforme osnovnog obrazovanja, nabavke besplatnih udžbenika za što veći broj djece, nastojanje da se za što veći broj djece koja stanuju na udaljenosti većoj od 4 km obezbjedi prevoz do škole, kontinuiranoj edukaciji nastavnog osoblja, kroz održavanje seminara, okruglih stolova itd. U oblasti srednjeg obrazovanja i odgoja fokus aktivnosti Ministarstva biti će na koordinaciji opremanja školskih prostora, te nabavke opreme i učila, provođenje kurikularne reforme srednjeg obrazovanja, kontinuiranoj edukacije nastavnog osoblja, nastavku provođenja politike upisa učenika u srednje škole u skladu sa potrebama tržišta rada, koordinaciji saradnje sa poslovnim subjektima u pogledu provođenja praktične nastave, provođenje aktivnosti koje su definisane Zakonom o obrazovanju odraslih na području Bosansko – podrinjskog kantona Goražde, realizaciji sastanaka sa donatorima u svrhu osiguranja vanjskih izvora sredstava za unapređenje oblasti obrazovanja i dr. Promocija kulture te sufinansiranje važnih kulturnih dešavanja na području Bosansko - podrinjskog kantona Goražde, uspostavljanje partnerskih odnosa sa institucijama u oblasti nauke, kulture, tehničke kulture i informisanja, fokus je narednog trogodišnjeg perioda. U oblasti sporta raditi će se na podršci i promovisanju takmičarskog sporta kroz redovne i dodatne programe registrovanih sportskih klubova te programima korištenja i modernizacije sportskih objekata, kao i podsticanju i promovisanju rekreativnog, školskog te sporta lica sa invaliditetom. Rad na jačanju kapaciteta mladih ljudi i omladinskih udruženja kroz podršku njihovih projektnih aktivnosti, nastavak saradnje sa omladinskim udruženjima i nevladinim organizacijama s ciljem aktivizma mladih i poticanja formiranja vijeća mladih bitan je segment narednog trogodišnjeg rada Ministarstva. U oblasti bezbjednosti saobraćaja Ministarstvo će nastaviti raditi na obezbjeđivanju uslova za provođenje ispita za vozače motornih vozila, te izvršiti provjeru ispunjavanja uslova za rad auto škola.

## **PRAVOSUĐE, UPRAVA I RADNI ODNOSI**

Fokus ključnih usmjerenja u sektoru pravosuđa, uprave i radnih odnose bit će usmjeren ka unapređenju kvaliteta efikasnosti i profesionalnosti zaposlenosti u državnoj službi, kontinuirano ulaganje u obrazovanje i edukaciju zaposlenih, povećanja i nadogradnje postojećih kompetencija i vještina državnih službenika i namještenika a sve u cilju pružanja što kvalitetnije i transparentnije usluge građanima i pristupa javnim službama

## **UNUTRAŠNJI POSLOVI**

U planiranom razdoblju u sektoru unutrašnjih poslova će se provoditi mjere koje je su utvrđene u Strategiji razvoja Bosansko-podrinjskog kantona Goražde. Konkretnije, ono što bi trebalo preovladati u radu su pitanja koja se odnose na unapređenje pravne i stvarne sigurnosti građana i njihove imovine, unapređenje borbe protiv svih oblika kriminala kako u domenu sprečavanja tako i u domenu otkrivanja zloupotrebe opojnih droga, korupcije, terorizma,

maloljetničke delinkvencije, vršnjačkog nasilja, krivičnih djela ratnog zločina i krađe, poboljšanje sigurnosti u saobraćaju, te unapređenje pravnog okvira za obavljanje poslova iz oblasti unutrašnjih poslova. Stalne edukacije, stručno usavršavanje i unaprijeđenja policijskih službenika, državnih službenika i namještenika u sklopu planiranih aktivnosti doprinijet će kvalitetnom pružanju javnih usluga i osjećaju sigurnosti građana.

## **URBANIZAM, PROSTORNO UREĐENJE I ZAŠTITA OKOLIŠA**

Fokus ključnih aktivnosti u sektoru urbanizma, prostornog uređenja i zaštite okoline usmjeren je na obezbjeđenje zaštite prirodnih resursa kroz uvođenje politike sprječavanja novog zagađenja okoliša, smanjenja postojećeg itd. Okvirna područja djelovanja odnose se na:

- Uspostavljanje sistema redovnog praćenja okolišnih parametara,
- redovna kontrola i praćenje eko stanja,
- Izrada planskih akata kojima se obezbjeđuje zaštita okoliša i biodrživost,
- Uspostavljanje informacionog sistema prostornog uređenja i zaštite okoliša,
- Saniranje deponija koje predstavljaju prijetnju za okoliš (remedijacija bivše deponije komunalnog otpada i deponije šljake),
- unaprijeđenje zaštite i obnovu prirodnih resursa,
- povećanje energetske efikasnosti,
- unaprijeđenje sistema adekvatnog prikupljanja i zbrinjavanja čvrstog otpada u skladu sa principima cirkularne ekonomije ,
- ulaganje u obnovljive izvore energije,
- harmonizacija propisa iz oblasti zaštite životne sredine,
- podizanje svijesti građana o važnosti zaštite životne sredine i slično,
- Nastavak realizacije projekta "Zeleni ekonomski razvoj" (saradnja sa međunarodnim organizacijama),
- Izrada energetske audita i slično, a sve u cilju osiguranja kvalitetnijeg života građana.

Također u 2022. godini planirane su aktivnosti na stvaranje uslova za izgradnju stambeno-poslovnog objekta „Lamela “ u Goraždu u sklopu koje bi se izgradilo 18 novih stambenih jedinica, a u poslovnom dijelu objekta bi se stvorili uslovi za adekvatno rješavanje smještaja Kantonalnog Centra za socijalni rad koji trenutno radi u izuzetno lošim uslovima. Aktivnosti koje se planiraju u ovoj godini su: izbor pravnog lica koje bi u javnom postuoku na to steklo pravo, a paralelno sa tim bi se provodio javni poziv za podnošenje prijave –zahtjeva za kupovinu novosagrađenih stanova pod povoljnim uslovima.

Naravno prije pokretanja bilo koje od aktivnosti potrebno je pribaviti svu potrebnu dokumentaciju kao i donijeti određene propise i pravilnike kojima bi se detaljno regulisao način izbora kako izvođača radova tako i potencijalnih kupaca stanova i poslovnih prostora.

Pored toga, planirana je i rekonstrukcija i dogradnja već nadograđenih stambenih prostorija u ul. M.Bajića Baje u Vitkovićima čime bi se dobilo 5 novih stambenih jedinica čijom prodajom bi se obezbjedila sredstva za nastavak realizacije projekta izgradnje zgrade „Lamela L“u Goraždu.



## **REALIZACIJA I MONITORING**

U dijelu Ciljeva i politike Bosansko-podrinjskog kantona Goražde za 2022. godinu, u kojem su ciljevi razrađeni po oblastima, odnosno ministarstvima, vidljiva je nadležnost pojedinih ministarstava za realizaciju određenih ciljeva.

Bez obzira na činjenicu da su ciljevi definisani i nadležnosti pojedinih ministarstava, gledajući u cjelini i ostvarenje ciljeva i politika Bosansko-podrinjskog kantona Goražde za 2022. godinu neće biti moguće bez koordinacije, saradnje i zajedničkog angažmana svih institucija i pojedinaca u organima zakonodavne i izvršne vlasti Bosansko-podrinjskog kantona Goražde.

Stalno praćenje aktivnosti i finansijskih tokova kroz redovno izvještavanje Vlade i Skupštine Bosansko-podrinjskog kantona Goražde doprinijet će stvaranju jasne slike koja se odnosi na potrebe građana Bosansko-podrinjskog kantona Goražde.

Praćenje realizacije Ciljeva i politike Bosansko-podrinjskog kantona Goražde za 2022. godinu biće kontinuirano i kroz planirani monitoring. Monitoring će osigurati praćenje svih programa, projekata, mjera, ciljeva kao i pravovremeno i potpuno informisanje Vlade i Skupštine Bosansko-podrinjskog kantona Goražde, poslovne, akademske, civilne i političke zajednice.

## **PRIJEDLOG MJERA ZA UNAPRIJEĐENJE RADA ČIJE ĆE PROVOĐENJE OMOGUĆITI STVARANJE PRETPOSTAVKI ZA PROVOĐENJE CILJEVA I POLITIKA UTVRĐENIH OVIM DOKUMENTOM**

U 2021. godini, nakon što se donekle stavila pod kontrolu pandemija prouzrokovana koronavirusom COVID-19, došlo je do značajnog povećanja privrednih aktivnosti. Ukoliko Bosansko-podrinjski kanton Goražde nastavi provođenje određenih mjera, odnosno započne provođenje odedenih mjera ekonomske i fiskalne politike i mjera na unapređenja rada institucija u 2022. godini se očekuje značajno povećanje javnih prihoda.

Dakle, da bi se anuliralo smanjenje prihoda Bosansko-podrinjskog kantona Goražde iz perioda pandemije kononavirusa COVID-19, te da bi se obezbjedila dugoročna finansijska stabilnost i unaprijedio rad institucija, što će sve za poslijedicu imati poboljšanje uslova za život i poslovanje na području Bosansko-podrinjskog kantona Goražde Vlada Kantona kao i svi budžetski korisnici obavezni su poduzeti čitav niz mjera.

Te mjere će biti poduzete kako na prihodovnoj tako i na rashodovnoj strani Budžeta a iste uključuju:

- Poduzmanje svih potrebnih mjera i aktivnosti kako bi se prilikom izrade novog Zakona o pripadnosti javnih prihoda u Federaciji Bosne i Hercegovine prihvatili prijedlozi Ministarstva za finansije Bosansko-podrinjskog kantona Goražde, te argumentacija iz analitičkih dokumenata koje je pripremlilo to Ministarstvo, a sve kako bi se Bosansko-podrinjski kanton Goražde pozicionirao na adekvatan način
- Aktivnije učešće svih struktura vlasti u Bosansko-podrinjskom kantonu Goražde u zajedničkom lobiranju na nivou Federacije BiH kako bi se u cilju fiskalnog izravnjanja Bosansko-podrinjskom kantonu Goražde u vidu transfera-grant doznačila potrebna sredstva, odnosno kako bi se radi uravnoteženja novčanog toka jedan dio tih sredstava za 2022. godinu sa Federalnog nivoa vlasti ranije doznačio Bosansko-podrinjskom Kantonu.

- Poduzimanje odgovarajućih aktivnosti u cilju povećanja prihoda od poreza na imovinu i sprječavanje evazije istih. Saradnja i koordinacija između Kantona, opština u sastavu Kantona i Poreske uprave Federacije BiH se mora značajno unaprijediti.
- Jasno definisanje prioriteta prilikom dodjele podsticaja za privredne aktivnosti sa posebnim akcentom na dodjelu istih prevashodno subjektima koji su registrovani za obavljanje privrednih djelatnosti, a koji će uposliti nove radnike što će dovesti do povećanja broja zaposlenih, a time i povećanja uplate poreza i doprinosa
- Provođenje postupka javnih nabavki u skladu sa Zakonom o javnim nabavkama Bosne i Hercegovine, odnosno na način da se postigne povoljnija cijena i na taj način ostvare uštede u Budžetu Kantona
- Uvođenjem bolje kontrole potrošnje materijala i sitnog inventara, te odgovornije upravljati svim materijalnim troškovima, te u tom cilju započeti i projekat informatizacije rada organa uprave u Kantonu.
- Smanjenje rashoda za nabavku stalnih sredstava
- Boljom kontrolom stvarnog korištenja usluga prevoza učenika od strane škola, te prevoza boračkih populacija moguće je napraviti uštede na troškovima prevoza.
- Rigoroznijom kontrolom provođenja postupka uvođenja korisnika u pravo po osnovu socijalne zaštite, revizijom i vršenjem inspeksijskog nadzora postojećih rješenja, odnosno socijalnih davanja moguće je spriječiti uvođenje, te izvesti iz prava one koji već ostvaruju primanja po ovom osnovu, a kojima ova davanja nisu neophodna i koji nisu i ne trebaju biti uvedeni u pravo na određeni oblik socijalne zaštite.
- Rigoroznijom kontrolom, odnosno provjerom ispunjavanja uslova po postojećim rješenjima za ostvarivanje dodataka na platu, te naknada koje nemaju karakter plate, a posebno naknade za prevoz na i sa posla moguće je ostvariti dodatne uštede.
- Rigoroznijom kontrolom provođenja postupka, kao i same dodjele sredstava na ime tekućih transfera privrednim subjektima, neprofitnim organizacijama i pojedincima, te utvrđivanjem obaveze javnog i transparentnog provođenja postupka dodjele navedenih sredstava
- Intenziviranjem aktivnosti na naplati potraživanja, te poduzimanje zakonom predviđenih mjera u slučaju neispunjavanja ugovorenih obaveza
- Smanjenje transfera prilikom kojih sredstva odlaze iz Kantona, to jest, transfera koji nemaju uticaja na povećanje potrošnje u Kantonu.
- Smanjenje tekućih transfera neprofitnim organizacijama za najmanje 20% iz razloga što ovi transferi nemaju efekta na povećanje zaposlenosti, te samim tim ni prihoda po osnovu poreza i doprinosa.
- Intenziviranjem aktivnosti oko evidentiranja i uknjižavanja cjelokupne imovine BPK Goražde na području BPK Goražde i u drugim državama.
- Kontrola upošljavanja kod budžetskih korisnika mora biti pojačana, te svako novo upošljavanje mora biti opravdano i dobro obrazloženo, te odobreno jedino u slučaju nemogućnosti popune tog radnog mjesta premještajem postojećih uposlenika. Osim toga potrebno je izvršiti provjere kod svih budžetskih korisnika u smislu da li određeni uposlenici ispunjavaju uslove za penzionisanje, te u tom slučaju iste bez odlaganja penzionisati.
- Preispitivanje rada komisija i naknada koje se isplaćuju za njihov rad, te predvidjeti da sve komisije svoje aktivnosti obavljaju u toku radnog vremena jer se u tom slučaju komisije ne plaćaju, a u isto vrijeme se povećava radni angažman uposlenika.

Navedene mjere ukoliko budu bez odlaganja provedene unaprijediti će rad značajnog broja institucija, odnosno značajnog broja budžetskih korisnika, te mogu u značajnoj mjeri pomoći u stvaranju pretpostavki za provođenje ciljeva i politike Kantona, ali i unaprijediti rad značajnog broja institucija, odnosno značajnog broja budžetskih korisnika.

Broj: 01-04-131/22  
28. februara 2022. godine  
G o r a ž d e

**PREDSJEDAVAJUĆA SKUPŠTINE**

Aida Sirbubalo